

दिनांक 13.07.2025
 समय: 18.45 बजे
 आकाशवाणी जयपुर—अजमेर
 प्रादेशिक समाचार

- रेलवे रेलगाड़ियां रा सगळा डिब्बा मांय यात्रियां री सुरक्षा बढाबा खातर सीसी.टी.वी. कैमरा लगाबा रो फैसलो कर्यो ।
- केंद्र सरकार राज्यां अर केंद्र शासित प्रदेशां ने नकली अर घटिया खाद री आपूर्ति माथे तुरत कठोर कार्रवाई करबा रा निर्देश दिया ।
- केन्द्रीय मंत्री भूपेन्द्र यादव कह्या—देश ने आगे बढाबा खातर भावी पीढी ने तैयार करणो सगळा री जिम्मेदारी है ।
- प्रदेश मांय बत्ती ठौड़ां माथे मेह बरसबा रो दौर जारी— पूर्वी राजस्थान मांय आवता दो हफ्ता ताई बत्तो मेह बरस सके है ।

रेलवे रेलगाड़ियां रा सगळा डिब्बा मांय यात्रियां री सुरक्षा बढाबा खातर सीसी.टी.वी. कैमरा लगाबा रो फैसलो कर्यो है । रेल मंत्री अश्विनी वैष्णव अर राज्य मंत्री रवनीत सिंह बिट्टू रेल इंजनां अर डिब्बां मांय सीसीटीवी कैमरा लगाबा री प्रगति री समीक्षा करी । कोच मांय कैमरा लगाबा सूं यात्रियां री सुरक्षा व्यवस्था मांय सुधार व्हेला । इण सूं असामजिक तत्वां ने पिछाणबा मांय मदद मिलेला । यात्रियां री निजता ने ध्यान मांय राखता थकां ये कैमरा बोगियां रा दरवाजा रे कने लगाया जावेला । श्री वैष्णव सगळी 74 हजार बोगियां अर 15 हजार रेल इंजनां मांय सीसीटीवी कैमरा लगाबा ने मंजूरी दी है । हर एक कोच मांय चार डोम टाइप सीसीटीवी कैमरा अर रेल इंजनां मांय छह सीसीटीवी कैमरा लगाया जावेला ।

रेलवे सेवारत अर सेवानिवृत्त कर्मचारियां अर वां रा आश्रितों रा रेफरल मामला मांय ईलाज खातर उम्मीदकार्ड आधारित मोबाईल ओटीपी जरूरी कर दीनो है । केई बगत गंभीर बीमारी रा ईलाज खातर रोगियां ने रेलवे सूं जुड़ी निजी अर सरकारी सफाखाना मांय भेज्यो जावे है । बदली व्ही व्यवस्था रे मुजब संबद्ध सफाखाना मांय इलाज खातर उम्मीद कार्ड मांय रजिस्टर्ड मोबाइल नम्बर माथे एक ओटीपी भेज्यो जावेला । ओटीपी देबा रे पाछे ई मरीज रो ईलाज सुरू कर्यो जावेला । उत्तर—पश्चिम मंडल सगळा सेवारात अर सेवानिवृत्त कर्मचारियां सूं आप रो उम्मीदकार्ड बेस्ट मोबाईल नम्बर तुरंत प्रभाव सूं अपडेट कराबा रो निर्देश दियो है । जिण सूं बिना परेशानी के ईलाज करायो जा सके है ।

केंद्र सरकार राज्यां अर केंद्र शासित प्रदेशां ने नकली अर घटिया खाद री आपूर्ति माथे तुरत कठोर कार्रवाई करबा रा निर्देश दिया है। केंद्रीय कृषि मंत्री शिवराज सिंह चौहान सगळा राज्यां अर केंद्र शासित प्रदेशां रा मुख्यमंत्रियां ने इण बाबत कागद माण्ड्यो है। कृषि मंत्री कह्या के राज्य सरकार चावती तादाद मांय काश्तकारां ने खाद मुहैया करणो पक्को करे। यो राज्य सरकारां रो दायित्व है। श्री चौहान राज्यां सूं दोषियां रा लाइसेंस ने रद्द कर रपट दर्ज कराबा ने भी कह्या है।

राज्य मांय कश्तकारां ने मजबूत बणावा अर खेती रा हलका मांय विकास री दिशा मांय लगातार काम कर्यो जा रह्यो है। काश्तकारां री आमदनी दुगनी करबा रा लगस सूं न्यारी-न्यारी योजनावां माथे काम कर्यो जा रह्यो है।

राष्ट्रपति द्रौपदी मुर्मु जान्या मान्या वकील उज्ज्वल देवराव निकम, सामाजिक कार्यकर्ता सदानंदन मास्टर, पूर्व विदेश सचिव हर्षवर्धन श्रृंगला अर इतिहासकार अर शिक्षाविद मीनाक्षी जैन ने राज्यसभा मांय मनोनीत कर्यो है। गृह मंत्रालय एक अधिसूचना जारी कर इण फैसला री जाणकारी दी। महाराष्ट्र रा रहवासी श्री निकम मुंबई आतंकवादी हमलां रा मामलां मांय सरकारी वकील रह चुक्या है। केरल रा सदानंदन मास्टर रो शिक्षा जगत मांय महताऊं योगदान रियो है। श्री श्रृंगला अमरीका, बांग्लादेश अर थाईलैंड मांय राजदूत रा रूप मांय भी काम कर चुक्या है अर सुश्री जैन दिल्ली विश्वविद्यालय रा गार्गी कॉलेज मांय इतिहास री एसोसिएट प्रोफेसर रह चुकी है। मुख्यमंत्री भजन लाल शर्मा राज्यसभा मांय सांसद रा रूप मांय मनोनीत कर्या गया आं चारू लोगां ने शुभकामनावां दी।

केन्द्रीय मंत्री अर अलवर सांसद भूपेन्द्र यादव आज नीमराणा मांय 111-ए स्टेट हाईवे री नीव राखी। इण मांय करीब 50 करोड़ रिप्यां री लागत सूं 48 किलोमीटर लम्बी सड़क बणायी जावेला। इण सूं 11 गांवां ने बेहतर सड़क सुविधा मुहैया व्हेला। यो हाई-वे नीमराणा सूं सरु व्हे र नागौड़ी घिलोट, डाबड़वास, चावंडी होता व्ह्या हरियाणा ताई जावेला। इण मौके केन्द्रीय मंत्री भूपेन्द्र यादव कह्या के इण सूं एक और जठे उद्योगां ने बेहतर कनेक्टिविटी मिलेला वठे ही आमलोगां ने सुगम अर सुरक्षित परिवहन सुविधा मिलेला। वणा कह्या के देश ने आगे बढ़ाबा खातर आवती पीढ़ी तैयार करणो सगळा री जिम्मेदारी है।

प्रदेशभर मांय बत्ती ठौड़ां माथे चौमासा री बारिश रो दौर जारी है। राजधानी जयपुर मांय आज सुवांरे सूं ही बादळा छया रिया अर रिमझिम पाणी बरस्यो। गंगानगर अर हनुमानगढ मांय तेज बरसात व्ही, वठिने डींग मांय भी दोपहरा पाछे हल्को मेह बरसबा री खबर है। उठिने पाली मांय घटाटोप मेह बरसबा सूं सड़का माथे पाणी भर ग्यो। बत्ती जाणकारी म्हाका खबरनवीस सूं-

वठिने बांसवाड़ा ज़िला मांय भी तेज मेह बरसबा रो दौर जारी है। ज़िला रा घाटोल हलका मांय मूसलाधार पाणी पड़बा सूं ठौर-ठौर पाणी भर ग्यो।

इण रे इतर सिरोही, उदयपुर, डूंगरपुर, चित्तौडगढ, दौसा, बारां, समेत केई ठौड़ा सूं मेह बरसबा रा समचार है। मौसम केन्द्र जयपुर आज प्रदेश मांय केई हलकां मांय भारी बारिश रो अलर्ट जारी कर्यो

है। केन्द्र रे मुजब राज्य रा तीस ज़िला मांय कठिने भारी तो कुछ एक ठौड़ा बत्ती ऊं बत्ती बिरखा होबा रो अन्दाजा है। इण बीच टोंक ज़िला रा बीसलपुर बांध मांय लगातार व्हे री पाणी री आवक सूं उण रा जल स्तर मांय बढ़ोतरीव्ही है। बांध मांय करीब तीन सौ चौदह आर.एल मीटर ताई पाणी भर ग्यो है। बतायो जावे है के बीसलपुर बांध सूं जयपुर, अजमेर, टोंक, किशनगढ़ अर ब्यावर शहरां मांय पीबा रो पाणी पूगायो जावे है। मौसम मेहकमो अन्दाजो जतायो है के पूर्वी राजस्थान री बत्ती ठौड़ा मांय आवता दो हफ्ता ताई चौखो मेह बरसेला अर सामान्य सूं बत्ती बिरखा व्हे सके है। वठिने पश्चिमी राजस्थान मांय भी झमाझम मेह बरसबा रा आसार है।

राज्य सरकार खनिज ब्लॉक मांय बेगी परिचालन खातर काम तेज कर दियो है। खान मेहकमां रा प्रमुख शासन सचिव टी. रविकांत बताया के ऑक्शन ब्लॉक्स रा परिचालन मांय होबा वाळी देरी अर दूजी समस्यावां रो हल काडबा खातर 16 जुलाई ने जयपुर मांय राख्यी जाबा वाळी बैठक मांय इण बाबत चर्चा करी जावेला। इण खातर खान मेहकमो राजस्व वन अर पर्यावरण मेहकमो अर भारतीय खान ब्यूरो समेत **स्टेट एनवायरमेंट इम्पेक्ट एसेसमेंट अथारिटी-सीया** ने सांझो मंच मुहैया करवायो जा रह्यो है। वे बताया के इण कार्यशाला मांय नीलाम खानां री परिचालन प्रक्रिया मांय होबा वाळी देरी रा कारण जाण र उण ने दूर करबा माथे चर्चा करी जावेला। सरकार लाइसेंस धारकां अर अप्रधान लीज धारकां ने खनिज पट्टां री मियाद बढ़ाबा खातर आवेदन री तारीख 30 सितम्बर कर दी है।

प्रदेश मांय तीन न्यारी-न्यारी ठौड़ा व्हा हादसा मांय सात लोगां री मौत व्हे गयी। दिल्ली-मुम्बई एक्सप्रेस-वे माथे कोटा ज़िला मांय कार अर टैम्पो री टक्कर मांय चार लोगां री मौत व्हे गयी। इण हादसा मांय छह लोग घायल व्हे गया। पुलिस रे मुजब ये लोग करौली रा रहवासी हा। अर इन्दौर सू एक कार्यक्रम मांय शामिल व्हे र लौटता टेम हादसा रा शिकार व्हे गया। वठिने पाली मांय आज सूंवारे बाली-मुंडारा मार्ग माथे एक मोटरसाइकिल रे बेकाबू हो र पलटबा सू एक महिला री मौत व्हे गयी अर दो लोग गंभीर रूप ऊं घायल व्हे गया। घायलां ने इलाज खातर जोधपुर रैफर कर्ग्यो ग्यो है। वठिने भीलवाड़ा ज़िला रा बडला पंचायत हलका मांय बकरियां चराबा गया दो भाईयां री बरसाती नाळा मांय डूबबा सू मौत व्हे गयी। कोटा मांय व्हा भीषण सड़क हादसां ने ले र राज्यपाल हरिभाऊ बागडे दुःख जतायो है। वठिने मुख्यमंत्री भजन लाल शर्मा सोशल मीडिया संदेश मांय कह्या के दिल्ली-मुम्बई एक्सप्रेस-वे माथे व्ही दुर्घटना मांय जनहानि री सूचना बेहद दुःख पूर्ण है। वणा जिला प्रशासन ने घायलां रो चौखो इलाज करबा रा निर्देश दिया।

विश्व स्वास्थ्य संगठन भारत मांय पारंपरिक चिकित्सा खासकर आयुष पद्धति रे सागे आर्टिफिशियल इंटेलिजेंस ने जोड़या जावा ने एक महताऊ कदम बतायो है। संगठन आप री तकनीकी रिपोर्ट मांय कह्यो के आयुर्वेद, योग, प्राकृतिक चिकित्सा, यूनानी पद्धिती, सिद्ध सोवा रिग्पा अर होम्योपैथी रे सागे **आर्टिफिशियल इंटेलिजेंस** रो असरदार उपयोग कर्ग्यो जा रह्यो है।
